

Na osnovu člana 16. stav 4. Zakona o Vladi Zeničko-dobojskog kantona - Prečišćeni tekst („Službene novine Zeničko-dobojskog kantona“, broj: 7/10) na prijedlog ministra zdravstva i predsjednika Kriznog štaba Ministarstva zdravstva Zeničko-dobojskog kantona, Vlada Zeničko-dobojskog kantona, na 141. sjednici, održanoj dana 11.02.2022. godine, d o n o s i

ZAKLJUČAK

I.

Usvaja se Informacija o epidemiološkoj situaciji COVID-19 u Zeničko-dobojskom kantonu na dan 06.02.2022. godine, s prijedlogom Naredbi Kriznog štaba Ministarstva zdravstva.

II.

Usvajaju se Naredbe Kriznog štaba Ministarstva zdravstva koje su sastavni dio ovog zaključka (Prilog 1.).

III.

Naredbe Kriznog štaba Ministarstva zdravstva donose se sa rokom važenja od 14 dana, računajući od dana 11.02.2022. godine, koji se utvrđuje kao dan početka primjene ovih Naredbi.

IV.

Zadužuje se Krizni štab Ministarstva zdravstva da prije isteka roka iz tačke III. ovog zaključka, sagleda kompletnu epidemiološku situaciju COVID-19 u Zeničko-dobojskom kantonu i sačini procjenu rizika, a radi razmatranja mogućnosti i potrebe izmjene naredbi utvrđenih ovim zaključkom, te Vladi Zeničko-dobojskog kantona dostavi prijedlog novih naredbi i preporuka.

V.

Ovaj zaključak stupa na snagu danom donošenja i objavit će se u „Službenim novinama Zeničko-dobojskog kantona“.

Broj: 02-33-2290/22

Datum, 11.02.2022. godine

Zenica

PREMIJER

Mirnes Bašić

DOSTAVLJENO:

1x Ministarstvo zdravstva,

1x Krizni štab Ministarstva zdravstva, putem Ministarstva,

1x svim zdravstvenim ustanovama na području Kantona, putem Ministarstva,

1x svim ministarstvima i drugim organima kantonalne uprave,

1x svim gradovima/općinama,

1x službena web stranica Zeničko-dobojskog kantona i Ministarstva zdravstva,

1x „Službene novine Zeničko-dobojskog kantona“,

1x a/a.

**NAREDBE KRIZNOG ŠTABA
MINISTARSTVA ZDRAVSTVA ZENIČKO-DOBOJSKOG KANTONA**

I. OPĆE NAREDBE

1. Dopušteno je okupljanje maksimalno 30 osoba u zatvorenom prostoru.

Izuzetno od tačke 1. ove Naredbe, dopušteno je okupljanje maksimalno 60 osoba u zatvorenom prostoru uz ispunjenje sljedećih uvjeta:

- negativan antigenski test ne stariji od 24 sata ili PCR test ne stariji od 48 sata ili
- potvrdu o prebolovanom COVID-19 ne stariju od 4 mjeseca ili
- potvrdu o završenoj vakcinaciji.

2. Dopušteno je okupljanje maksimalno 100 osoba na otvorenom prostoru.

Izuzetno od tačke 2. ove Naredbe, dopušteno je okupljanje maksimalno 200 osoba na otvorenom prostoru uz ispunjenje sljedećih uvjeta:

- negativan antigenski test ne stariji od 24 sata ili PCR test ne stariji od 48 sati ili
- potvrdu o prebolovanom COVID-19 ne stariju od 4 mjeseca ili
- potvrdu o završenoj vakcinaciji.

Sva okupljanja unutar navedenih ograničenja moraju se odvijati u prostoru koji omogućava obavezan fizički razmak od najmanje 2 metra između osoba (osim članova istog domaćinstva).

S ciljem smanjenja rizika od COVID-19 i zaštite ličnog zdravlja, za vrijeme okupljanja potrebno je obavezno pridržavanje preporuka (higijensko-epidemioloških mjera) koje je donio Zavod za javno zdravstvo Federacije BiH i Institut za zdravlje i sigurnost hrane Zenica.

Za provođenje higijensko-epidemioloških mjera na skupovima odgovorni su organizatori okupljanja i obavezni su postupati u skladu sa propisima o javnim okupljanjima.

II. NAREDBE ZA ZDRAVSTVENE USTANOVE

1. Naređuje se nadležnim doktorima zdravstvenih ustanova primarne zdravstvene zaštite da prije upućivanja COVID-19 pozitivnog pacijenta u JU Kantonalna bolnica Zenica i JU Opća bolnica Tešanj, obavezno kontaktiraju nadležnog infektologa JU Kantonalna bolnica Zenica, odnosno pulmologa JU Opća bolnica Tešanj.

Pacijeti iz općina/grada Zenica, Visoko, Kakanj, Breza, Zavidovići, Žepče i Vareš upućuju se u JU Kantonalna bolnica Zenica.

Pacijenti sa područja općina Tešanj, Maglaj, Usora i Doboj Jug upućuju se u JU Opća bolnica Tešanj.

2. Naređuje se zdravstvenim ustanovama primarne zdravstvene zaštite obavezno i kontinuirano provođenje i dokumentovanje procedure aktivnog praćenja pacijenata oboljelih od COVID-19.
3. Zadužuju se JU Kantonalna bolnica Zenica i JU Opća bolnica Tešanj da organizaciju rada specijalističko konsultativne zdravstvene zaštite na terenu, usklade sa epidemiološkom situacijom.
4. Nalaže se privatnim zdravstvenim ustanovama da svakog radnog dana do 10⁰⁰ sati, izvrše prijavu zarazne bolesti COVID-19, higijensko-epidemiološkim službama domova zdravlja na području Kantona (u daljem tekstu: HES) u skladu sa članom 10. stav (2) Pravilnika o načinu prijavljivanja zaraznih bolesti ("Sl. novine FBiH", broj: 101/12), a na osnovu pozitivno utvrđenih rezultata PCR i AG testiranja.
5. Nalaže se privatnim zdravstvenim ustanovama da svakog radnog dana do 10⁰⁰ sati nadležnoj HES, dostave ukupan broj izvršenih AG testiranja.

III. NAREDBE ZA HIGIJENSKO-EPIDEMIOLOŠKE SLUŽBE DOMOVA ZDRAVLJA

1. Nalaže se svim HES domova zdravlja na području Kantona da svakog radnog dana do 12⁰⁰ sati, svim gradskim/općinskim sanitarnim inspektorima, obavezno putem službenog e-mail, izvrše prijavu zarazne bolesti COVID-19, u skladu sa članom 10. stav (2) Pravilnika o načinu prijavljivanja zaraznih bolesti ("Sl. novine FBiH", broj: 101/12).
2. Nalaže se HES JU Poliklinika sa dnevnom bolnicom Doboj Jug, da prijavu zarazne bolesti iz prethodne tačke ove Naredbe, obavezno putem službenog e-mail dostavi kantonalnoj sanitarnoj inspekciji.

IV. NAREDBE ZA PREDŠKOLSKE USTANOVE

1. Nalaže se predškolskim ustanovama stroga primjena standarda i mjera biosigurnosti.
2. Predškolske ustanove obavezne su osigurati da prostorije za boravak djece, imaju odgovarajuću površinu i to manimalno 2m² za svako dijete, s tim da grupe imaju maksimalno 20 djece.

V. NAREDBE ZA SUBJEKTE KOJI U OKVIRU REGISTROVANE DJELATNOSTI PRUŽAJU USLUGE ZA DJECU PREDŠKOLSKOG UZRASTA

1. Naređuje se subjektima koji u okviru registrovane djelatnosti pružaju usluge za djecu predškolskog uzrasta, stroga primjena standarda i mjera biosigurnosti.
2. Subjekti iz tačke 1. ove Naredbe, obavezni su osigurati da prostorije za boravak djece, imaju odgovarajuću površinu i to manimalno 2m² za svako dijete, s tim da grupe imaju maksimalno 20 djece.

VI. NAREDBE ZA UGOSTITELJSKE OBJEKTE

1. Nalaže se ugostiteljskim objektima striktno postupanje po Naredbama Kriznog štaba Federalnog ministarstva zdravstva, koje je usvojila Vlada Federacije Bosne i Hercegovine, uz obavezno pridržavanje higijensko-epidemioloških mjera donijetih od Zavoda za javno zdravstvo u Federaciji BiH.
2. Nalaže se ugostiteljskim objektima da stolove u ugostiteljskom objektu rasporede na način da se broj raspoloživih stolica za goste, odredi tako da za svaku stolicu pripada minimalno 2 m² površine prostora namijenjenog za prijem gostiju objekta.
3. Nalaže se ugostiteljskim objektima da na vidnom mjestu u objektu istaknu informaciju koja sadrži sljedeće podatke:
 - površina dijela objekta namijenjenog za smještaj gostiju,
 - broj raspoloživih stolica za goste objekta.
4. Nalaže se ugostiteljskim objektima da se pridržavaju procedura i preporuka (higijensko-epidemioloških mjera) izdatih od Instituta za zdravlje i sigurnost hrane Zenica, koje su objavljene na službenoj web stranici Instituta www.inz.ba
5. Nalaže se ugostiteljskim objektima da zaduže osobu koja će osigurati provođenje mjera iz tačke VI. podtačka 1. 2. i 3. ove Naredbe.
6. Za provođenje mjera iz ove Naredbe, odgovorno je pravno lice, kao i odgovorna osoba u pravnom licu, te fizičko lice registrovano za obavljanje ugostiteljske djelatnosti.
7. Zadužuju se nadležne inspekcije da vrše pojačan inspekcijski nadzor provođenja naloženih mjera u ugostiteljskim objektima, svako u okviru svoje nadležnosti.
8. Zadužuju se nadležne inspekcije da protiv lica koja ne poduzimaju mjere u skladu sa ovom Naredbom, kao posebnim propisom u uvjetima proglašene epidemije u Federaciji BiH, privremeno zabrane rad ugostiteljskog objekta za koji se utvrdi da ne provodi mjere u skladu sa ovom Naredbom.

VII. NAREDBA ZA ORGANE UPRAVE I DRUGA PRAVNA LICA

Naređuje se svim organima uprave i drugim pravnim licima na području Zeničko-dobojskog kantona, koje pružaju usluge šalter sale, da odrede osobu za kontrolu pravilnog provođenja higijensko-epidemioloških mjera ispred ulaza u objekat i to obavezno pravilno nošenje maske preko usta i nosa i poštivanje fizičke distance od minimalno 2 metra za sve osobe koje se nalaze ispred objekta.

VIII. NAREDBE ZA VJERSKE INSTITUCIJE I POGREBNA DRUŠTVA

1. Nalaže se vjerskim zajednicama na području Zeničko-dobojskog kantona da osiguraju striktno provođenje mjera iz tačke 1. ove Naredbe.
2. Nalaže se svim vjerskim institucijama na području Zeničko-dobojskog kantona da se prilikom održavanja vjerskih obreda pridržavaju procedura i preporuka

(higijenskoepidemioloških mjera) izdatih od Instituta za zdravlje i sigurnost hrane Zenica, koje su objavljene na službenoj web stranici Instituta www.inz.ba

3. Nalaže se svim pogrebnim društvima da se striktno pridržavaju procedura i preporuka (higijensko-epidemioloških mjera) za dženazu/sahranu osoba preminulih od COVID-19 izdatih od Instituta za zdravlje i sigurnost hrane Zenica, koje su objavljene na službenoj web stranici Instituta www.inz.ba

IX. NAREDBE ZA GRADOVE/OPĆINE

1. Nalaže se gradovima/općinama Zeničko-dobojskog kantona da u skladu sa Naredbom o standardima i normativima zdravstvene zaštite iz obaveznog zdravstvenog osiguranja, u okviru budžeta osiguraju djelimično finansiranje HES-i domova zdravlja i službi hitne medicinske pomoći.
2. Nalaže se gradovima/općinama da osiguraju odgovarajući broj inspektora za nadzor nad provođenjem naloženih mjera, kao i drugih poslova iz nadležnosti sanitarnog inspektora, te da u planiranju poslova sanitarnih i drugih inspektora prioritet daju poslovima inspektora koji su u funkciji kontrole epidemije Covid-19.

X. NAREDBE ZA NADLEŽNE INSPEKCIJSKE ORGANE

1. Nalaže se Kantonalnoj upravi za inspekcijske poslove Zeničko-dobojskog kantona (u daljem tekstu: Kantonalna uprava za inspekcijske poslove) i gradskim/općinskim inspekcijama, da u skladu sa svojim nadležnostima pojačaju inspekcijski nadzor svih inspekcija, u cilju kontrole i provođenja naređenih mjera utvrđenih Naredbama Kriznog štaba Federalnog ministarstva zdravstva, koje je usvojila Vlada Federacije Bosne i Hercegovine i Naredbama Kriznog štaba Ministarstva zdravstva koje je usvojila Vlada Zeničko-dobojskog kantona, radi sprječavanja širenja COVID-19 na području Zeničko-dobojskog kantona.
2. Nalaže se nadležnim inspekcijama da Kriznom štabu Ministarstva zdravstva dostave izvještaje o pojačanom inspekcijskom nadzoru, u cilju kontrole provođenja naređenih mjera i sprječavanja širenja COVID-19, te da navedene izvještaje dostavljaju u kontinuitetu svakih 14 dana.
3. Nalaže se nadležnim inspekcijama da prijavu zarazne bolesti COVID-19 koju zaprime od nadležne HES, odmah po prijemu unesu u elektronsku bazu podataka Ministarstva unutrašnjih poslova Zeničko-dobojskog kantona, odnosno nadležne policijske uprave/policijske stanice.
4. Za lica kod kojih je utvrđena zarazna bolest COVID-19 po prijavi bolesti iz tačke 3. nadležni sanitarni inspektor obavezan je bez odlaganja donijeti rješenje o zabrani kretanja i izolaciji u kućnim uslovima za oboljele osobe i osobe iz kontakta, u skladu sa Zakonom o zaštiti stanovništva od zaraznih bolesti i Kantonalnim planom pripravnosti za oboljenja izazvana COVID-19.

XI. NAREDBE ZA UPRAVU POLICIJE MINISTARSTVA UNUTRAŠNJIH POSLOVA ZENIČKO-DOBOJSKOG KANTONA

1. Nalaže se Upravi policije, Ministarstva unutrašnjih poslova Zeničko-dobojskog kantona (u daljem tekstu: Uprava policije) da putem policijskih službenika, svakodnevno i kontinuirano vrši kontrolu osobe koje su oboljele od zarazne bolesti COVID-19 i osobe iz kontakta, u skladu sa podacima koji su uneseni u elektronsku bazu podataka Ministarstva unutrašnjih poslova.
2. Nalaže se Upravi policije da o svakom nepoštivanju izolacije u kućnim uvjetima, bez odlaganja obavijesti nadležne inspekcije i poduzme mjere u skladu sa Zakonom o krivičnom postupku, a u vezi sa članom 226. Krivičnog zakona FBiH.
3. Nalaže se Upravi policije da poduzme mjere iz svoje nadležnosti i da pruži potrebnu podršku inspekcijским službama u toku vršenja inspekcijskog nadzora u cilju kontrole provođenja naređenih mjera i sprječavanja širenja COVID-19.

XII. NAREDBE ZA ODRŽAVANJE ROČIŠTA U SUDOVIMA ZENIČKO-DOBOJSKOG KANTONA

Dozvoljava se održavanje ročišta u sudovima Zeničko-dobojskog kantona uz pristustvo maksimalno 50 osoba, tako da svakoj osobi pripada najmanje 2 m² prostora, uz obavezno poštivanje preporuka Instituta za zdravlje i sigurnost hrane Zenica, koje su objavljene na službenoj web. stranici Instituta www.inz.ba .

XIII. NAREDBA ZA ODRŽAVANJE SJEDNICA I RADNIH TIJELA SKUPŠTINE ZENIČKO-DOBOJSKOG KANTONA I GRADSKIH/OPĆINSKIH VIJEĆA

Dozvoljava se održavanje sjednica i radnih tijela Skupštine Zeničko-dobojskog kantona i gradskih/općinskih vijeća, uz prisustvo maksimalno 50 osoba, uz obavezno poštivanje preporuka Instituta za zdravlje i sigurnost hrane Zenica, koje su objavljene na službenoj web. stranici Instituta www.inz.ba.